

Smanatschà gia uss cun il referendum

Helvetia Nostra smanatscha cun il referendum cunter la lescha per abitaziuns secundaras gia avant che la lescha è en il parlament. L'organisaziun vul impedir ch'i vegnia memia bleras excepziuns en la lescha tar l'iniziativa cunter abitaziuns secundaras, ha ditg l'advocat da Helvetia Nostra, *Pierre Chiffèle*. Tranter auter va quai per l'excepziun ch'emprimas abitaziuns ch'eran gia bajegiadas avant la votaziun il mars 2012, duain vinavant dastgar vegnir nizzegiadas ubain era vendidas sco abitaziuns secundaras. Helvetia Nostra pretenda in summa ina glista exacta da las excepziuns en la lescha – e che questa cuntegna damain excepziuns che l'ordinaziun transitorica vertenta.

Agir vilenta Martin Schmid

La nov'attatga da Helvetia Nostra vilenta ils adversaris da l'iniziativa. In dad els è il cusseglier dals chantuns grischun *Martin Schmid* (pld). L'agir da Helvetia Nostra mussia cleramain che la decisiun dal tribunal federal n'haja betg mo consequenzas per ils permiss da construcziun ch'èn vegnids dads tranter il di da la votaziun ils 11 da mars 2012 e la fin da l'onn, mabain era per tut ils permiss sunter. La culpa sajan ils derschaders a Losanna che hajan confermà che Helvetia Nostra haja in dretg da recurs tar projects da construcziun.

Impedir projects da possessurs indigens

Martin Schmid è persvadì che l'organisaziun da *Franz Weber* vegnia a duvrar quel dretg era per impedir projects da possessurs indigens. Quai che na saja betg stà l'intent da l'iniziativa. Quella vulleva impedir la construcziun dad abitaziuns secundaras novas e betg chastiar la populaziun indigena.

Dretg da possess en dumonda

Pervia da la decisiun dal tribunal federal saja ussa da far quint che



Cusseglier dals stans Martin Schmid.

l'iniziativa per limitar la construcziun da segundas abitaziuns vegnia realisada a moda fitg severa. Quai che pudessia lura era metter en dumonda il dretg da possess dals indigens. Per exempel il dretg d'astgar vender ubain duvrar abitaziuns primaras ch'èn vegnidas construidas avant la votaziun sco segundas abitaziuns. Quai lubeschia l'ordinaziun transitorica il mument. Tge che la situaziun actuala signifitgia vesia el en ses mintgadi sco advocat, di Schmid. Bliers possessurs sajan irritads e malsegirs e na sappian betg tge far. Perquai dovria quai ussa segirezza giuridica.

Evitar ch'i vegnia restrenschi anc pli fitg

Ensemen cun auters parlamentaris vul Martin Schmid perquai preschentar gia proximamain ina proposta detagliada per la lescha da las segundas abitaziuns. Vi da quella duess lura il cussegl federal s'orientar per la proposta ch'el trametta en il parlament. La gronda prescha per elavurar la lescha ha dentant anc in'otra raschun. Uschia vulan Schmid e ses alliads er impedir che Helvetia Nostra possia cun plants al tribunal federal restrenscher anc pli fitg las excepziuns per las segundas abitaziuns.